

Diskour Linogirasyon Prezidan Danny Faure - 16 Oktob 2016

Prezidan James Michel

Prezidan James Mancham

Sef Ziz

Prezidan Lakour-Dapel,

Speaker Lasanble Nasyonal

Minis

Manm Lasanble Nasyonal

Your Excellencies Heads of Diplomatic Missions

Envite distenge

Frer ek Ser Seselwa

Se avek bokou limilite ki mon adres zot ozordi. Ozordi I komansman en nouvo sapit. En nouvo sapit akoz en nouvo zenerasyon pe pran la bar avek sa zenerasyon kin anmenn lalit pou lendepandans, batir nasyon Seselwa, e kree en sosyete modern.

Mon apresye ki pou nou ariv kot nou ete ozordi, bokou dimoun in travay dir e fer bokou sakrifis. Nou sorti byen lwen. E menm tre lwen. Ozordi mon dir zot en gro mersi. Lo lapar Nasyon Seselwa, mon rann omaz a Prezidan Mancham, Prezidan Rene e Prezidan Michel pour zot rol dirizan. Mon osi sezi lokazyon pour salye kontribisyon pep Seselwa pour fer Sesel sa ki I ete ozordi.

Prezidan Michel, sa mwan I fer egzakteman 31 an depi konman Minis Ledikasyon sa letan ou ti donn mwan loportinite pour mwan partaz mon konesans avek zanfan e lazenes Seselwa. Mersi Prezidan pour sa loportinite kinn ouver plizyer lezot loportinite pa zis pour mwan, me pour de milye zenn nou pei.

Diran nou parkour kinn enn ranpli avek plizyer defi pour nou pti Nasyon, mon aprann avek ou pou touzour gard en regard touzour fikse lo sa ki pli gran ki nou. Sa se byennet nou Pep e nou pei.

Anba ou Prezidans, Sesel inn temwannyan en transformasyon ekonomik san presedans. Ounn travay tre dir pou donn Sesel son plas ki i merite dan lemond. Bokou pou ganny koze lo sa ki oun fer pour Sesel e Seselwa. Avek letan, bokou pou ganny ekri. Sa ki kler pour mwan se ki ou travay pour kontinyen koz pou limenm avek pasaz letan.

Ozordi, apre 39 an ki ou'n dan Konsey Minis, e 12 an konman nou Prezidan, mon oule salye ou pour ou sakrifis personnel, ou travay dir e ou dedikasyon o servis lepep Seselwa. Mon zwenn Nasyon Seselwa pou swet ou tou de bon dan ou retret e ki nou donn ou sa respe ki ou merite.

Ser frer e ser pep Seselwa, mon kwar dan nou Nasyon. Mon kwar dan Sesel. Mon kwar dan en Sesel touzour ini e dan en Sesel lib e fyer. Ozordi sa Sesel ki nou tou nou kontan pe ofer nou sa loportinite ekstra-ordiner pour nou regard lavenir avek konfyans ek optimizm. Nou Sesel ki nou tou nou kwar ladan pe apel sakenn de nou pour zwenn ansanm pou sirmont bann diferans e lobstak ki ankor pe diviz nou. Souvann fwa, e parfwa san realize, nou vinn viktim nou pase e nou santi nou pri dan politik lepase. Mon konpran sa! Pandan sa dernyen 39an, Sesel inn devlope, Sesel inn progrese. Pour bokou nou sitwayen,

Gouvernman inn fer bokou pour rann zot lavi pli ere. Par kont, I annan lezot nou frer ek ser, ki krwar ki Gouvernman I reste rezon pou zot soufrans e douler, ozordi mon senserman prezant zot en leskiz.

Konman zot Prezidan mon kwar ki pou Sesel vreman atenn linite Nasyonal dan tou son sans, nou bezwen pas dan en prosis vre rekonsilyasyon.

Nou annan bokou plis pou akonplir koman en Nasyon e en Pep si nou sirmont sa ki diviz nou. Les nou diferans dan nou lopinyon politik vinn nou lafors ki fer vibre nou demokrasi e non pa en lobstak ki touf nou demokrasi. Nou bezwen vwar diversite dan nou linite konman en nouvo lafors ki pou ranforsi sa linite Nasyonal ki nou vreman oule pour nou Sesel.

Ser frer ek ser pep Seselwa.Sesel I pli gran ki nou. Nou paviyon nasyonal I pli gran ki nou. Sesel I nou vre patri. Dan sa Sesel nou tou nou annan en plas.

Sakenn de nou nou kapab enterpret rezilta eleksyon diferaman. Sa ki sitan kler se par lavolonte lepep, lepep Seselwa inn demann nou pour koze e pou travay ansanm. Alors, ozordi, plis ki zanmen, nou bezwen travay ansanm pour benefis nou Pep e Sesel.

Mon pare pour travay avek Lasanble Nasyonal. Monn enform Speaker Lasanble Nasyonal, Onorab Patrick Pillay, ki an linny avek lartik 92(1) nou Konstitisyon, mardi le 18 Oktob mon pou adres sa lenstitisyon kot mon ti konmans mon karyer politik 23 an pase. Sa I pour lokazyon pou mwan koz lo travay nou gouvernman.

Ser frer e ser pep SeselwaMwan en zanfan SPUP, sa parti malere, sa parti travayer, sa parti kinn anmenn lalit pour lendepandans. Nou pa ankor realiz tou sa vizyon ki SPUP ti annan pour Sesel. Devlopman Sesel I bezwen santre lo pep Seselwa se sel fason pou eliminn lapovrete. Bann prensip ki pour donn plis viger lenplimantasyon nou program devlopman se: lazistis; legalite dan loportinite; lazistis sosyal e redistribisyon larises. Mon pou fer tou, pour ki nou bann polisi i reflekte sa bann prensip.

Ser fer e ser Pep SeselwaMon kwar dan sa prensip fer di byen pour nou frer ek ser. Ler sakenn de nou nou osi fer dibyen, kolektivman sosyete i vinn pli ere. Lo sa semen, nou tou nou bezwen retir mesanste, retir malis, retir ditor, e retir lensilt ki abes nou devan lize nou Kreater.

Mon kwar dan en Sesel kot okenn nou sitwayen pa ganny kit deryer, dan en sosyete ki annan konpasyon. Dan en Nasyon kot vre dignite imen I ganny respekte. Ki personn pa devret par lao lalwa e ki lalwa I aplik parey pour nou tou.

Mon kwar fermeman dan en sistenm proteksyon sosyal iniversel ki labaz pou mentenir nou koezyon sosyal e larmoni entern, ki osi kondisyon pour lape dirab.

Mon kwar dan en Sesel kot I annan plas pour diferan lide ko-egziste, e konman en Nasyon, nou'n pare pour kree plis lespas kot lide e lopinyon divers I ganny ekoute e respekte. E parey nou Konstitisyon i demande nou donn nou sitwayen akse a lenformasyon.

Mon kwar dan lonekte, lentegrite, e lafransizm. Si okenn nou sitwayen ki annan okenn plent oubyen okenn laprev lo okenn aksyon dezonnnet kot lalwa pe ganny kase, oubyen drwa imen son prosen pe ganny vyole oubyen abize, I devret san lafreyer apros bann lotorite konsernen, pour ki lazistis I ganny aplike. Lo sa semen, tou sitwayen I bezwen pran responsabilite pour son aksyon.

Mon kwar dan lafors travayer Seselwa, e dan son kapasite pour anmenn Sesel pli devan. Mon kwar dan disiplin, dan travay dir,e dan en sosyete kot tou travay I ganny valorize. Irrespektiv ou lopinyon politik, ou kwayans relizyez, ki swa ou dan sekter prive ou sekter piblik, sa ki enportan se ki ou desarz travay ki ou'n ganny demande pou fer. E ou desarz li avek tou responsabilite ki i al avek. Konman anplwayer nou pey travayer selon son merit e dapre lalwa. E nou tret byen tou nou travayer sanz eksepsyon.Lo sa

semen, partenarya ant sekter prive, sekter piblik e sosyete sivil i bezwen pli angaze. Se selman atraver en partenarya pli solid ki nou kapab ganny prosperite partaze pour nou Pep.

Sa ki mon kwar ladan se sa ki mon pou met an pratik dan mon travay e dan legzekisyon program ki nou annan pour pep Seselwa e Sesel.

Ser frer e ser pep Seselwa. Pour mwan ariv kot mwan ete ozordi, I annan bokou zot kinn akote mwan. Zot konnen lekel zot. Mon konnen ki zot pe santi. Mwan en prodwi sa ki SPUP ti dir pou annan pour son zenes 52an pase. Ozordi mon dir zot mersi. Mon dir mersi mon paran. Mon manman, Violet Samson, mon papa Jean Faure. Tou le de Seselwa. Zot in bers mwan, fer mwan grandir pour konn lobeisans, respe, disiplin, e travay dir. Mon remerci mon de frer ek mon trwa ser kinn touzour la akote mwan. En remersiman tre spesyal pour mon fanmiy kin donn mwan tou sipor tou di lon.

Mon dir mersi Per Lafortune pour tou gidans ki in donn mwa konman lafannker dan legliz Anse Royale. Mon salye mon zenerasyon marmay 62 e sirtou mon bann zanmi lekol e mon bann ansennyan.

Sakenn de nou I ganny enspire par diferan dimounn, par diferan personalite. Mwan, monn ganny enspire par Prezidan Rene. Ozordi, mon dir li en gran mersi. Son bann prensip tel ki laliberte e lazistis sosyal kin anim nou lalit pour lendepandans e kreasyon en sosyete pli zis. Konman Prezidan Larepublik mon pli determinen ki zanmen pour kree sa sosyete touzour pli zis, pli fraternel, pli ini, pli prosper, e pli imen. Ozordi, mon demann zot mon bann frer e ser Seselwa pour zwenn mwan pour nou antrap lanmen pour nou fransir sa prosenn letap. Kot ansanm, nou pa les tonbe lape e laliberte, e kot nou reste touzour ini, touzour ansanm.

Mon debout konman zot serviter pare pou deservi pep Seselwa e Sesel.

Viv pep Seselwa.

Viv Sesel.